

- Perversos mores quorundam presbiterorum,
 Qui celebrant missas non laudibus Omnipotentis,
 190 Sed precii causa, de crimine provenientis.
 Quidam baptizant pro munere denariorum,
 Quos nec amat nec habet proprios sibi vita bonorum.
 Si qui peniteant, abolere nefas cupientes,
 Ante sacerdotes hos se peccasse fatentes,
 195 Annos per septem quod non posset renovari,
 Presbiteri dicunt per mensem posse novari.
 Quid dicam, quod habent uxores dote paratas,
 Quas nos scimus eis decretis esse negatas?
 Sed qui formidant uxores dote tenere,
 200 Alterius sponsam caute conantur habere.
 Qui vero nequeunt sponsas superare pudicas,
 Inter scortorum sordes volvuntur amicas.
 Hec manibus tangunt in Christo sanctificatis,
 Presulibus gemma promissa virginitatis.
 205 Proh pudor! hii salvant homines baptismatis unda¹,
 Se vero perimunt vitiorum sorde profunda.
 Cum quos baptizant cernunt florere beatos,
 Et se conspiciunt vitiorum mole gravatos,
 Heu qua fronte Deum miseri spectare valebunt,
 210 Cuius terribiles voces audire timebunt,
 Cum dicet pravis: 'Tormenta doloris adite,
 Sed vos, o fratres, ad pacis regna venite?'
 Ista sacerdotes discendo scire laborant,
 Quæ cum forte sciunt, nec amant Christum nec honorant.
 215 Sic non currebat mitis grex presbiterorum,
 Qui iam precedens congauDET in arce polorum.
 Abbatissarum quid dicam de levitate,
 Quæ gaudent uti meretricum garrulitate,
 Vestitu vario sua membra tegunt studiose,
 220 Ut Veneri placeant consorti luxuriose.
 In cameris resident cortinis undique captis
 Sedibus appositis circumque tapetibus aptis.
 Ad quas si veniat raro licet hospes honestus,
 O quam conspicitur color istis esse modestus!
 225 Harum vero miser si suscipiatur amicus,
 Vultus cedit eis, et mos, et sermo pudicus.
 Normas claustrenses² postponit seva libido,
 Quas Venus atque suus natus regit ipse Cupido.
 Sic non vivebat Glodesindis virgo pudica,
 230 Que non fit mortis, sed vite dulcis amica.
 Terrenum sponsum spernens herebique cavernas,
 Celestem sponsum petiit sedesque supernas.

1) Cod. Clar. p. 248.

2) 'claustrales' Rem.